



Skóla- og frístundasvið
Borgartún 12-14
105 Reykjavík

Reykjavík, 16. júlí 2026
SFS23090177

Hér með sendist útskrift úr fundargerð borgarráðs frá 16.7.2026 varðandi eftirfarandi mál:

SFS - Samstarfssamningur við Móðurmál – samtök um tvítyngi um afnot af húsnæði - til afgreiðslu

Lagt fram bréf skóla- og frístundasviðs, dags. 9. júlí 2026, þar sem óskað er eftir að sviðsstjóra verði heimilað að gera samning við Móðurmál – samtök um tvítyngi um afnot af húsnæði, ásamt fylgiskjöllum.
Samþykkt.

Steinn Jóhannsson tekur sæti á fundinum undir þessum lið með rafrænum hætti.

Borgarráðsfulltrúar Sjálfstæðisflokksins, Viðreisnar og Framsóknarflokksins leggja fram svohljóðandi bókun:

Fulltrúar meirihlutans leggja áherslu á mikilvægi þess að gerður verði nýr samningur við Móðurmál - samtök um tvítyngi fyrir skólaárið 2026-2027. Gjaldfrjáls móðurmálskennsla tryggir börnum jafnt aðgengi að kennslunni óháð efnahag fjölskyldna og styður við rétt þeirra til að viðhalda og efla eigið tungumál. Góð þekking á eigin móðurmáli er mikilvægur grunnur að virku tvítyngi, auknu læsi og farsælu námi í íslensku. Samningurinn gerir börnum jafnframt kleift að nýta frístundakortið til þátttöku í öðrum íþróttum og frístundum, sem er mikilvægur þáttur í félagslegri þátttöku þeirra og tengslum við samfélagið.

Helga Björk Laxdal
e.u.



Reykjavík



Reykjavík, 9. júlí 2026

SFS23090177

Samstarfssamningur við Móðurmál – samtök um tvítyngi um afnot af húsnæði

Óskað er eftir að sviðsstjóra skóla- og frístundasviðs verði heimilt að gera samning við Móðurmál – samtök um tvítyngi til samræmis við meðfylgjandi drög að samningi. Samningurinn er efnislega samhljóma eldri samning sem var undirritaður þann 1. nóvember 2023 vegna skólaáranna 2023-2024, 2024-2025 og 2025-2026. Samkvæmt drögum að nýjum samning fá samtökin afnotarétt af hluta húsnæðis skóla- og frístundasviðs í Fellaskóla og Hólabrekkuskóla til kennslu tvítyngdra barna á laugardögum. Nýting húsnæðis skóla- og frístundasviðs verður Móðurmáli að kostnaðarlausu. Jafnframt er greiddur kostnaður vegna húsvörslu og þrifa í skólunum sem um ræðir. Þá greiðir skóla- og frístundasvið einnig styrk fyrir skráningu bókakosts bókasafns Móðurmáls í Gegni. Mótframlag samtakanna er í formi fræðslu til foreldra og kennara í leik- og grunnskólum og til frístundaráðgjafa um mikilvægi móðurmáls í námi barna. Samningurinn fellur sjálfkrafa úr gildi 6. júní 2029 og tekur til skólaáranna 2026-2027, 2027-2028 og 2028-2029.

Málið kemur beint til afgreiðslu borgarráðs vegna sumarleyfis skóla- og frístundaráðs.

Virðingarfyllst,

Steinn Jóhannsson
sviðsstjóri skóla- og frístundasviðs

Hjálagt:

Drög að samstarfssamningi um afnot af húsnæði



Reykjavík

Skóla- og frístundasvið Reykjavíkurborgar, kt. 530269-7609, annars vegar og samtökin Móðurmál, kt. 421101-2990, hins vegar, gera með sér svohljóðandi:

Samstarfssamning

1.gr.

Markmið

Í lögum nr. 91/2008, um grunnskóla og lögum nr. 19/2013, um samning sameinuðu þjóðanna um réttindi barnsins er kveðið á um mikilvægi þess að viðurkenna kunnáttu barna í móðurmáli sínu og veita þeim tækifæri til að viðhalda því. Í aðalnámskrá grunnskóla (2011) segir: „Mikilvægt er að bjóða nemendum kennslu í eigin máli þar sem þeir eiga þess kost að læra um mál, bókmenntir og menningu og fá þjálfun í málnotkun.“ Lykillinn að því að börn þrói með sér virkt tvítyngi, þ.e. sterkt móðurmál um leið og þau læra íslensku sem annað tungumál, er falinn í góðu samstarfi foreldra og kennara um þróun máls og læsis. Markmið þessa samnings er að styðja við móðurmál tvítyngdra barna og auka möguleikann á því að börn þrói með sér virkt tvítyngi.

2. gr.

Samstarf skóla- og frístundasviðs og Móðurmáls

Móðurmál fær afnotarétt af hluta húsnæðis skóla- og frístundasviðs í Fellaskóla og Hólabrekkuskóla til kennslu tvítyngdra barna á laugardögum skólaárin 2026-2027, 2027-2028 og 2028-2029. Notkun lykurlausn við skólaslit að vori og hefst að nýju að hausti við upphaf skóla. Notkun húsnæðisins verður ákveðin í samráði Móðurmáls við stjórnendur á hverjum stað.

Nýting húsnæðis skóla- og frístundasviðs verður Móðurmáli að kostnaðarlausu en metin innri leiga sem samtökunum er veitt vegna þessa er kr. 1.100.000,- á ári. Jafnframt er greiddur kostnaður vegna húsvörslu og þrifa í skólanum kr. 1.500.000,- til hvors skóla á ári. Mótframlag samtakanna er í formi fræðslu til foreldra og kennara í leik- og grunnskólum og til frístundaráðgjafa um mikilvægi móðurmáls í námi barna. Einnig greiðir skóla- og frístundasvið fyrir skráningu bókakosts bókasafns Móðurmáls í Gegni að upphæð kr. 228.400,- á ári hverju, eigi síðar en í júní.

Í samstarfi móðurmáls og fagskrifstofu skóla- og frístundasviðs verður gerð áætlun um fræðslu til foreldra, leik- og grunnskólakennara og frístundaráðgjafa í Reykjavík um mikilvægi móðurmáls.

3. gr.

Upplýsingar um stöðu verkefna

Í lok hvers skólaárs skilar Móðurmál skóla- og frístundasviði greinargerð um framkvæmd áætlunar um fræðslu til foreldra, leik- og grunnskólakennara og frístundaráðgjafa í Reykjavík um mikilvægi móðurmáls.

4. gr.



Notkun húsnæðis og ábyrgð á tjóni

Móðurmál ábyrgist að öll umgengni í húsnæði skóla- og frístundasviðs verði til fyrirmyndar. Tryggt verði að nemendur Móðurmáls verði ávallt undir eftirliti kennara eða annarra forsvarsmanna samtakanna á meðan þeir dvelja í húsnæði skóla- og frístundasviðs. Móðurmál ber alla ábyrgð á starfsemi sinni sem fram fer í húsnæðinu.

Verði tjón á leigutíma Móðurmáls á eigum starfsstaða, sbr. 2. gr. s.s. á tækjum, húsbúnaði og bókum eða hlutum í eigu annarra sem eru í vörslu þessara starfsstaða skal Móðurmál bæta tjónið, teljist Móðurmál bera skaðabótaábyrgð á tjóni samkvæmt skaðabótalögum.

Tekin verður ákvörðun um opnun og lokun húsnæðis fyrir starfsemi Móðurmáls í samráði við stjórnendur á hverjum starfsstað, sbr. 2. gr.

5. gr.

Vanefndir

Skóla- og frístundasvið áskilur sér rétt til að rifta samningnum og/eða krefjast endurgreiðslu ef sannarlega er um forsendubrest eða vanefndir að ræða af hálfu samningsaðila.

Rísi ágreiningur um efni og/eða túlkun samnings þessa skal reka ágreiningsmál fyrir héraðsdómi Reykjavíkur.

6. gr.

Force Majeure

Hvorugur aðili verður talinn hafa brotið gegn samningi þessum, þegar honum er ókleift að uppfylla samningsskyldur sínar vegna atvika, sem rekja má til óviðráðanlegra ytri atvika (force majeure), s.s. vegna alvarlegra slysa, stríðsátaka, náttúruhamfara, deilna á vinnumarkaði, fyrirmæla stjórnvalda eða annarra óvæntra og ófyrirséðra atvika, sem samningsaðilum er ekki unnt að fyrirbyggja.

7. gr.

Gildistími o.fl.

Samningurinn gildir til þriggja ára vegna skólaáranna 2026-2027, 2027-2028 og 2028-2029 og lýkur þann 1. júní 2029. Gerður er fyrirvari af hálfu Reykjavíkurborgar um að fjárveitingar skóla- og frístundasviðs eru gerðar með fyrirvara um fjárheimildir skv. fjárhagsáætlun á hverju ári eftir fyrsta ár samningsins.

Samningsaðila er óheimilt að framselja réttindi sín og/eða skyldur samkvæmt samningi þessum, í heild eða að hluta, nema að fyrirframfengnu skriflegu samþykki hins.

Samningurinn er uppsegjanlegur af hálfu beggja samningsaðila hvenær sem er á samningstímabilinu með 1 mánaða fyrirvara miðað við næstu mánaðamót eftir uppsögn. Uppsögn skal vera skrifleg.

8. gr.

Undirritun

Samningur þessi er undirritaður með fullgildri rafrænni undirskrift í samræmi við ákvæði laga nr. 55/2019 um rafræna auðkenningu og traustþjónustu fyrir rafræn viðskipti og reglugerð (ESB) 910/2014 um sama efni. Með undirritun ábyrgjast viðkomandi einstaklingar jafnframt að þeir hafi umboð til að skuldbinda aðila, með þeim hætti sem samningurinn gerir ráð fyrir.



Reykjavíkurborg